

摘藻堂四庫全書薈要

集部

欽定四庫全書薈要

集部

御覽經史講義卷十八

詳校官編修臣汪鏞



欽定四庫全書蒼要卷二萬五百九十四

集部

御覽經史講義卷十八

詩經

不解于位民之攸墜

編修臣林枝春

臣謹按人君之位謂之天位言承天子民非以位為樂也易繫辭云聖人之大寶曰位何以守位曰仁言如天好生必常厥德以保厥位也國曷依依

於民后非衆罔與守邦衆奚托托於上思艱圖易
民乃寧然則兢兢業業一息無敢康者明王奉若
天道撫臨兆民於是乎在而約而言之聖學之所
以慎終慮始不外此克勤無怠謹小慎微之一心
是則人主持心必以憂勤惕厲為要矣夫假樂之
詩公尸所以答鳧鷖也當是時君燕其臣臣媚其
君一德泰交可稱極盛乃臣熟復其辭始舉其令
德以明受祿之由繼及其子孫以著申命之美終

之以不懈則又歸本王心而致其祈天永命之意
其心即卷阿矢音之心也其義即虞廷颺言之義
也然則久安長治總在克艱而無逸豐亨豫大勿
忘儆戒而綢繆詩人之旨可謂深切著明矣臣聞
人主圖治震動恪恭奮厲於始者恒易強毅果斷
維持於後者為難何則即位之初志氣方銳百度
維新動必有功施易見德是以樂於有為期其咸
理至數載以後綱紀既已釐定臣民既已服從德

化之所施惟在優游而漸漬之故其圖幾愈微而得效漸寡自非度量過人足以大有為之主則識見稍狹必沾沾自喜而隘其經綸而志願稍卑亦將悠忽苟安而漫為退托於是闡茸無能者借安靜之名儉邪媚悅者進愛身之說人主忽而不察久將信以為然則懈心一萌百為日弛建功立業者雖知其有為終苦其多事直言極諫者雖無疵其建白之意終不便其拂已之私於是乎水旱盜

賊有不必盡聞觀逸遊田有不能盡廢而其志荒
矣欲民之受其福詎可得乎夫事以漸而成而幾
自微而著勤之易而為懈也必其敬之弛而為肆
敬之漸弛則强者漸偷明者漸闇董子曰積善在
身如長日加益而人不及知也積惡在身如火銷
膏而人不及見也然則寢昌寢微語其極至於堯
桀之分而其間曾不容以髮亦奈之何不慎也臣
聞室穴蟻之隙則滔天之勢無自而成遏攸灼之

燄則燎原之憂無自而起謹言行之樞則千里之外即時而應人主九閭邃密儼若帝天而起居嚙笑時或傳於小民之口無微不彰良可儆惕此夙夜罔或不勤細行不矜終累大德大保奭所為歎息而言也亦在乎謹小慎微凜之又凜而已夫一日萬幾天位至艱惟明哲之后能無逸而乃逸故一饋十起禹所以興夏也昧爽丕顯湯所以造商也不遑暇食文王所以肇周也古之人君日出視

朝退適路寢聽政旦則考政夕而糾虔天刑是則
深宮燕處無非克艱天位之時若謂四方之耳目
既周在廷之職業無曠不妨於清閒之燕暫一留
連物玩陶寫性情不知此心有所係著即非虛靈
本體即使天性高明見而不惑而可欲之事日陳
於目前則抑畏之心難保其無替魏徵有言雖未
全妨政事不復專心治道樂之將極漸不克終可
為深戒且徒耽外物不求義理喪志之累典籍猶

然况竭百工財力僅以供耳目口體之所奉者哉
旅葬之訓曰不作無益害有益功乃成不貴異物
賤用物民乃足人主苟心存儉樸則宮室臺榭之
飾皆屬虛糜志甘淡泊斯服食器用之外別無重
寶有秉道畏義之誠則淫樂慝禮不足以櫻其視
聽凜宴安鴆毒之戒則蔽言大訓無往不切於羹
牆班朝治軍泣官行法無情容則清明在躬氣志
如神可知也前巫後史宗祝瞽侑在左右則中心

無為以守至正可知也逮夫膏澤旁流太和洋溢

農桑樂利之休歌詠太平永永勿替而民心洽天
位鞏矣書曰允迪茲生民保厥居其即攸墜之謂
歟由是百辟卿士益效其媚茲綱紀四方胥泯其
怨惡上以答保佑申命之隆下以綿子孫千億之
祚皆自不懈之一念基之矣抑洄酌之詩亦曰豈
弟君子民之攸墜使民有父之尊有母之親則可
謂能休息斯民矣幾有悅安強教之世而弗立隆

於主德者乎夫豈弟之君子即假樂之君子其無
安厥位錫福庶民一也

詩經

不解于位民之攸墜

監察御史

臣

彭肇洙

臣謹按養尊處優之說此中世之臣所以諛悅其君而古之人無是也古之人知天下不可宴然而治而又不可恃天下之既治而暫釋其憂勤故持盈保泰之慮雖笙簧酒醴間猶相與詠歌而不忘是以物阜民安其治遂臻於上理昔者姬周當成

康之世主聖而明臣賢而良綱紀畢張刑措不用
君若臣宜可以優游而無為矣及讀假樂之詩一
時百辟卿士何愛君之深憂民之切諄諄以不自
暇豫之詞為君勗也其曰不解于位民之攸墜非
其証與嘗試論之國家不難於治而難於長保其
治人君不難於勤而難於刻守其勤當其海宇未
清救寧未奏之日雖中主猶知戒懼及其四方無
事中外又安即聖主不免有侈心何者天下既無

憂警之虞而又見國富民殷何求不遂漸覺九重
之上宵衣旰食苦於拘束而不情而蕩心佚志之
場轉以為太平之盛事其後遂至於荒縱而不復
計閭閻之所安故愆宴安嚴隲情聖若成康臣下
猶兢兢乎難之則可知天位維艱而民生之勞墜
誠視乎君而不可一息或解也且夫民之勞墜亦
何常之有上之所見為墜下之所見為勞也上之
所見為勞下之所見為墜也人君無聲色貨利之

好則輸將墜人君無臺榭苑囿之娛則繇役墜人君無虞田弋獵之樂則供張墜人君無好大喜功之念則兵革墜是故勤率作力耕桑胼手胝足而不言其況瘁者民之不自墜也憂勤惕勵儆于有位夙夜不敢康則是君之所以使民墜也民之墜由於君而君之所以使民墜者由於不解故曰堯舜有為人主之勤無為人主之欲故天下各得濟其欲有為人主之位無為人主之心故天下各得

肆其心假樂之臣工其知愛君矣是以成康保此
道而太和翔洽祿自天申其後宣王有中興之德
而不慎厥終故雅詩一變而不復正也



詩經

度其隰原徹田為糧度其夕陽幽居允荒

監察御史臣衛廷璞

臣謹按此周家一代田制所自始而八百年王業所由開也周禮地官小司徒之職與遂人稻人所經理皆端本於此而四語之中經制之詳明推行之次第亦可細按焉度其隰原者猶審其高下也治野之法遂溝洫澮皆以通水於川要皆自高而

趨下蓋居其民於皇澗過澗之間水利可資因而
限之以溝涂表之以封植使其民通力合作計畝
均分而制度以定然非酌其高下之宜則無以定
行水之道故必度隰原而後可以徹田也夫古者
資農以立國資水以溉田黃帝經地設井禹盡力
乎溝洫濬畎澮距川其來舊矣公劉當播遷之始
即留心於此此其規模固已宏遠矣且古人有可
耕之田必有可牧之地周禮所謂井牧也蓋六畜

有所養而後無傷於稼穡原隰之間牧事可興而
田事愈治然後自近而遠度山西之田而益廣之
由是幽人之居於此益大矣嘗聞昔人有言曰以
水佐耕者豐以水佐守者固古者內為田廬外為
溝洫使戎馬有限即以伏險於順此地中有水所
以取象於師而齊之田畝不東所以塞乎晉謀也
公劉精心於治田故其民盡泉源之利而又得防
衛之資幽居之允荒也不亦宜哉厥後文王本之

以即功周公遵之以定制卜世卜年即謂兆於此
焉其亦可也

詩經

汭酌彼行潦挹彼注茲可以饒饒豈弟君子民之父
母汭酌彼行潦挹彼注茲可以濯罍豈弟君子民之
攸歸汭酌彼行潦挹彼注茲可以濯漑豈弟君子民
之攸堅

編修臣竇光鼐

臣謹按汭酌詩序云召康公戒成王也言皇天親
有德饗有道也善言天者必有徵於人書曰天視

自我民視天聽自我民聽民生之休戚其氣機常與天命流通而往來相應惟有道德者為能成民而致力於神此洞酌之大義也輔廣曰每章上三句有遠近相須彼此相益貴賤相資之意故以為興也蘇轍曰雖行潦之陋而無所棄猶父母之無棄子也父母之於子也愛之深故其為之慮事也精以深愛而行精慮故其為之避害也速而就利也果夫君子之於民亦若是則已矣記曰凱以強

教之弟以悅安之民皆有父之尊有母之親傳曰
民之所好好之民之所惡惡之此可謂民之父母
矣其繼之曰民之攸歸何也天下無欲離其父母
之子也則天下無能離君子之民也靈臺曰庶民
子來此之謂也既來之則安之故以民之攸墜終
焉何以安之則仍安之以父母之心爾父母之於
子未有不至於無憾而即安者也子之於父母亦
未有相處而不相安者也君子以父母自處而備

盡其鞠育之誠民各以子自處而相忘於怙恃之
德天保云民之質矣日用飲食安之至也羣黎百
姓徧為爾德有道有德之孚也神之弔矣詒爾多
福皇天親之饗之也此詩三章之義進而益深而
豈弟君子終無異詞何也君子者道德之極也皇
建其有極而後斂錫有本會歸無外風雨同好燠
暘時若徹上徹下治明治幽胥準諸此矣兆民允
懷而帝命不違明信聿昭而溪毛可薦書曰至治

馨香感于神明黍稷非馨明德惟馨此可與詩序
相証明者也顧此詩之辭備極揄揚而序以為戒
何也曾鞏有言曰歌其善者所以導其嚮慕興起
之意因以防其怠廢難久之情蓋履極盛之勢而
動之以戒懼者明之至知之盡也夫履極盛之勢
而保之以戒懼德惟日新道以時升將使萬世得
以戴巍巍履栗栗臭芳烈含甘實鏡純粹之至精
流惠愷於無極斯天下之上則已由斯以談則成

周之盛至今存也

詩經

洞酌彼行潦挹彼注兹可以餽饔豈弟君子民之父
母

少詹事 臣張鵬翀

孔氏穎達曰公劉洞酌卷阿俱召公所作厚民之
事人君之急務故先作公劉非有道德則不能愛
民故又作洞酌欲王之修德行道也君雖有德不
能獨治又作卷阿使王求賢用士也

輔氏廣曰每章上三句有遠近相須彼此相益貴賤相資之意故以興下兩句

朱氏公遷曰此以小物之功用興大德之功用明人君不可無豈弟之德也

臣謹按人君奉天子民有父母斯民之責父母之愛其子無所不至人主之愛民必如父母之愛其子始無愧為民之父母然愛之不得其道不免為小惠小信而無以盡乎強教悅安之實此洞酌之

詩所為惓惓於豈弟君子也夫以流潦之微酌之
於彼以挹其涓流注之於此以致其澄潔尚足以
資餼饔酒食之用祭祀燕享無所不宜况以大君
之德操挹注之權所為裒多益寡稱物平施使遠
邇均沾上下各足豈特如行潦之挹注而已乎顧
挹注之權操之自上而一有不得其宜不特小惠
小信如行潦之細不能沾溉即欲竭其倉廩府庫
以為施濟而民終不能遍被其澤者盖非有道德

以為酌劑不能明乎遠近相須彼此相益貴賤相
資之理往往顛倒失宜急遽無序欲以利民而適
以為厲者有之矣惟有豈弟君子之德者豈以強
教而非示威弟以悅安而非示惠至誠愷惻之意
流溢於家人父子之間然後能施濟咸宜教養畢
備故惟豈弟君子始無愧為民之父母也然人君
之為民父母其愛則同而勢則遠於萬里不能親
泣民間而為之挹注不能不授權於代為挹注之

人自監司以至於州縣長吏皆是也而州縣最親
民間所恃為父母者尤在州縣而自州縣以達之
天子其勢甚懸一有壅於上聞則疾苦無由知而
膏澤不下究甚者或掣其肘雖有挹注之便袖手
而不得施則所以宣上德而達下情使挹注之適
其宜者不尤在監司之得其人乎今之監司惟督
撫最重雖藩臬為地方專官率奉其意指耳處最
重之勢而於民甚疎一有不得其人則好惡任情

為害非細

臣

嘗論稍申藩臬之權使得與督撫互

相檢察以救偏重之弊而於州縣之治務持大體
勿責苛細俾得從容就理斟酌適宜豈非遠近相
須彼此相益貴賤相資之道乎

臣

是以流連於名

公洞酌之言而彌覺其義蘊之無盡也夫以潢汙
之水而欲資酒食之用挹彼注茲其中有無限道
理沈靜者能之而淺躁者不能也廉平者能之而
貪恣者不能也忠信者能之而詐偽者不能也明

辨者能之而闇昧者不能也持以觀人亦足知吏
治之大槩矣今之州縣豈少稽古愛民之良吏但
令監司皆得其人善為表率而無掣其肘循良之
治必多可稱請令吏民表其實蹟得上史館采其
尤著者褒顯之以風勵天下使互相觀感以成至
治斯則挹注之宜操之自大君而有餘者矣臣竊
有慮者食貨贏絀係生民大命方今海宇承平休
養日久而閭閻不見盈溢之象倉庫時廩不足之

虞平時僅足支持緩急恐無可恃是當酌盈劑虛以籌挹注之術而後可以成州縣之善治也臣嘗讀唐書食貨志太宗聽魏徵仁義之言貞觀四年斗米四錢外戶不閉開元初政任姚崇宋璟海內富實斗米之價錢十三青齊間斗纔三錢自後天子驕於佚樂用不知節歲出之數常過所入於是錢穀之臣始事朘刻贏餘競進以奉燕私卒至民物耗弊天下蕭然夫明皇以一人之身勤儉而致

富强奢侈而成耗弊至耗弊之後乃事腹刻以供
侈費譬如挹潢潦之水灌以漏卮涓涓幾何涸竭
可俟耳寧得為挹注之善術耶古者民有恒產故
無甚富甚貧今則貧富懸絕不可強齊均田限田
法雖可稱迫而行之徒足滋擾為民父母固不能
挹彼之富以注此之貧然而勞農勸相倡興勤儉
使貧者得免饑寒教以睦婣獎其任卹使富者不
至驕侈此則良吏所能為是亦挹注之道也當今

雖未見豐盈之象未至有耗匱之虞惟是清心寡
欲量入為出省無益之費罷不急之役自朝廷百
職事以至監司郡縣皆仰體為民父母之意震動
恪恭率作興事日計不足月計有餘庶幾國用日
充閭閻漸裕政平刑措風俗還淳其斯為挹注於
不竭之原乎豈第君子民之父母斯足當強教悅
安之實而無愧矣

詩經

有卷者阿飄風自南豈弟君子來游來歌以矢其音

侍讀臣周玉章

臣謹按自古君臣合德之朝乃有拜手颺言之盛
工虞水火極都俞吁咈於命官之時元首股肱合
喜起明良於賡歌之下此後世歌詩之所由作而
君臣倡和之有明徵也若夫遊觀之事聖王不廢
武宗衡華按方岳以周巡靈沼靈臺與辟廱而並

建推之省耕以勤補助田獵以選車徒無非上闕
國典下切民依豈第曰游目騁懷極視聽之娛而
已哉迨夫登涉所至作為詩歌或誌山川之靈秀
或咏風物之恬熙或念歲時之豐歉而憂喜互形
或辨俗尚之貞淫而勸懲並著或憶豐功偉烈而
深思締造之艱難或憫暑雨祁寒而周知閭閻之
疾苦一唱三歎莫非乾惕深衷依永和聲真覺神
人協聽一時扈從之臣授簡擣辭導揚盛美篤棊

之心形於頌禱諷咏之下間以箴規如召康公卷
阿之詩其大凡矣有卷者阿誌地也飄風自南紀
時也豈弟君子來游來歌以矢其音叙事也臣嘗
受其詩而讀焉既以伴吳優游極遊歌之樂即以
彌性受命迓純嘏之常先公百神交儆于宥密圭
璋聞望綱紀乎四方鳳翽梧生多吉人亦多吉士
馮翼孝德媚天子亦媚庶人豈弟君子不憚詞複
言重矢詩不多無事鋪張揚厲因善歌繼聲之中

寓隨事納誨之意故成王非盤遊而康公非虛譽也不幾與虞廷之賡歌比烈歟抑臣謂不特遊觀也即燕饗亦時有之傳曰享以訓恭儉燕以示慈惠鹿鳴皇華蓼蕭湛露諸什君所以燕其臣而天保頌其九如既醉備夫五福又臣所以答其君善乎朱子之言曰君臣之分嚴朝廷之禮敬然一於嚴敬則情或不通故先王制為燕饗之禮以通上下之情蓋平日分職課功無尺寸之地可寬而暫

時酒醴笙簧俾堂庶之分不隔優其禮益以厲爾
官常聯其情愈以生夫忠蓋由是詩以言志歌以
永言必且上如臯陶之載賡次亦如康公之遂歌
於以鼓吹休明贊襄鴻烈耀當時而傳後世誠盛
事也他若子虛上林雖意歸諷諫而究以藻繪為
工詞章之末無關要典唐太宗謂漢書載之為過
也宜哉

詩經

有卷者阿飄風自南豈弟君子采游來歌以矢其音

編修臣王居正

朱子曰此詩舊說亦召康公作疑公從成王游歌於卷阿之上因王之歌而作此以為戒

臣謹按古帝王繼天立極而開一代有道之長培萬年無疆之基者要惟是此心之兢業與百爾臣工共相砥礪於無逸而後君德以端王猷克茂焉

顧憂勤惕厲千聖同揅而守成之時恒嚴於創業
蓋開國之初規模未定紀綱方新承大統者方凜
凜於天命之不易集人心之不易聚賢才之不易
得而遠大之謀成於刻勵此盛治之所以開其先
也若夫太平無事之時以三光則得其明以四時
則得其序以庶類則得其所祖宗之積累至此而
發其光氣運之培養至此而煥其采是誠可樂者
乎然天地盈虛與時消息而治道之盛衰判於主

志此古之聖王持盈保泰朝乾夕惕恒慮之於極
盛之時而有虞所以有臯陶之賡歌有周所以有
卷阿之矢音也竊嘗取所矢之詩而繹之其大旨
要不外乎求賢以輔治而已思天眷之不易承也
則首言壽考福祿之盛以著受命之有本思君德
之不易成也則次言顒卬聞望之美以見親賢之
有益思君臣一心明良一德也則又言其相須甚
殷而相得益彰者以堅其側席旁求之誠其旨切

其詞婉言之者其有厚望歟獨是成王之時果何時也耶考之竹書紀年成王三十三年游卷阿斯時三監已去頑民已靖洛邑已成一統太平故駐蹕卷阿君臣賦詩以鳴國家之盛所謂太和在成周宇宙間此其時乎然當時佐命諸臣已多凋謝而周公亦致政歸國是君心之敬肆人才之進退天下之安危治忽其機在此一時故召公作此以相規也誠以君心者萬化之原賢才者國家之本

君心不可一日不敬不以太平游衍之時而可忽也賢才不可一日不進不以多士師濟之時而可緩也召公之隨事効忠因時納誨也如此其亦憂盛危明防微杜漸之意乎故曰慮之於極盛之時也抑又聞之范處義曰召公進戒曰求賢足矣必曰吉士吉人何也周公作立政以告成王亦曰其勿以儉人其惟吉士蓋儉利之人常近于薄吉善之人常近於厚使人主於用人之際必求吉善之

士而信任之雖其天資靜重不求赫赫之名誠足以壽風俗之脈為國家之福也由斯言觀之周召之所以効忠於君者從可知矣而其所謂賢者亦從可識矣且天之立君以為民也君之求賢亦以為民也故馮翼孝德之士用以輔君德則為良臣用以任民社則為良牧易曰養賢以及萬民書曰臣為上為德為下為民其與召公媚于天子媚于庶人之意互相發明乎夫成周之佐周召為最而

七月之篇推王業之根本所以端其始卷阿之歌
勵君德之無逸所以謹其終二臣之納誨雖異而
其致君於堯舜則一也此成王所以享宇宙太和
之盛而為有周八百年之令主歟後之君天下者
不忘乎民因以不忘乎人才之進退則賢才輔而
善人多一德成而天下治太和宇宙之盛庶幾再
見於今日哉

詩經

有卷者阿飄風自南豈弟君子來游來歌以矢其音

編修臣楊述曾

詩序曰卷阿召康公戒成王求賢用吉士也

臣謹按鄭氏詩譜大雅生民下及卷阿成王之時
詩也先生民以尊祖次行葦以仁厚美則有既醉
鳧鷖嘉樂戒則有公劉酌卷阿而求賢以自輔
尤為致治之本故卷阿一詩三致意焉臣竊誦其

辭而繹之卷阿屈曲有虛中之義喻求賢之心也

飄風長養有育物之功明求賢之用也伴奭爾游
際閒暇之時第祿爾康享和平之福而歸之於彌
爾性推之於媚庶人盖人君之用賢也莫先於陶
成德性莫大於愛養萬民古之聖王徇齊敦敏得
於天者厚矣然必齋戒其心神明其德姦聲亂色
不留聰明淫樂慝禮不接心術惰慢邪僻之氣不
設於身體猶恐出入之暇或有過差耳目所及或

未周廣於是敬禮老成弼亮之臣與之從容講論
慎選溫良端正之彥使之布列左右既有以漸摩
其德義涵養其性情復有以防其聞見之非節其
嗜慾之過故能習與性長化與心成否則居崇高
之位處豐豫之時百官奔走而惟恐或後萬方崇
奉而所欲必得則驕淫之漸逸欲之萌皆得乘其
間而中之其為德性之累夫豈少哉至於民惟邦
本凡為上者未有不知愛養者也然所謂愛養者

豈切切然今日降一詔明日行一事煦育之以為
恩施濟之以為澤哉得其人而理之則海宇乂安
人民樂業不得其人而理之則或果於自用而措
注非宜或頽墮委靡而奉行不力本欲以興利而
適滋其害本欲以除弊而益增其困紛紜叢脞既
非治道所宜宣布施行徒飾聽觀之美於民何賴
焉說命曰惟后非賢不乂言君雖明聖不能獨治
也立政曰繼自今立政其勿以儉人其惟吉士言

惟吉善之人有以惠民也從來恤利之人以苛為
察以刻為明矯飾外貌似是而非吉善之人天資
靜重惓惓無華日計不足月計有餘誠使得吉善
之人而任之則雖無赫赫之名殊異之績而慈祥
愷惻之恩忠厚長者之道自足以培福祿之基綿
仁壽之脈其利賴豈止一時已哉君德日充民氣
和樂土宇遐章極九州之廣圭璋聞望為四方之
綱昭受上帝申命用休由是禮明樂備則鳳凰之

雖喑鳴國家之盛此文章之事也覲光揚烈則車馬之庶閑任馳驅之用此克詰之備也求賢之用如此其廣用賢之效如此其大名公所以矢詩告誠歟抑臣又聞之小雅南山有臺樂得賢也其辭曰樂只君子邦家之基又曰樂只君子德音是茂夫君子即馮翼孝德之人所謂吉人吉士也得之以引翼乎一已則百神主焉彌爾性之謂也以引翼乎萬民則四方則焉媚庶人之謂也德音不已

保艾爾後則與顯顯印印純嘏爾常之說有互相
發明者宋臣曾鞏有云二雅之作勸帝者之功美
昭法戒於將來聖人所以列之於經垂為世教也
王者循類取稱本隱之顯自足興道致治垂諸無
窮豈徒比其聲音播之絃管而已哉

欽定四庫全書

卷十八

詩經

有馮有翼有孝有德以引以翼豈弟君子四方為則

編修臣董邦達

孔穎達曰言有善行可以為憑依者有藝能可以為輔翼者有至孝可以為感化者有大德可以為軌訓者王當以此長尊之以此恒敬之得此四等是樂易之君子可以四方為法則矣

臣謹按國家之用人臣子之事君以德為本以才

為末德可以統才才不可以槩德故周官司士功
詔祿能詔事久莫食必首之以德詔爵焉其在書
曰翕受敷施九德咸事則才在其中矣而大司徒
以鄉三物教萬民而賓興之亦曰六德六行六藝
先以德行不先以藝也夫行道而有得於心之謂
德古來純臣致主未有不本諸躬行心得而惟以
才華表見者今觀詩言馮則倚仗之謂非德何以
為倚翼則輔助之謂非德何以為輔孝則德之本

也百行之原也是馮翼孝德分之異名合之實一
德耳孔穎達以有翼專屬之藝能則偏而不該矣
當斯時壽考作人之治化猶新鎬京辟靡之鐘鼓
方盛而成王復基命宥密緝熙單心以日就月將
繼序思皇於是人才輩出無不爭自濯磨迪德修
行以儲朝廷股肱心膂之用故後章所云圭璋聞
望之美彌性之驗也藹吉離咎之盛馮翼孝德之
材也明明在朝穆穆布列聚精會神相得益章從

遊矢詩蓋紀實也維時朝無不飭之紀綱野無不
同之風俗上下無間驩忻交通為法於天下可傳
於萬世蓋成周之極盛庶幾乎賡歌喜起之風矣
古大臣之頌揚其君其知本哉後世人臣宜何如
其砥礪廉隅束身圭璧俾德優於才才本於德實
體夫格物致知誠意正心之學足以為上為德為
下為民克副官材論辯之典始膺引翼之選而不
媿也而學校之中所為陶冶而成之者尤當以德

行道藝樹之標準務使草野之內具有經綸康濟之猷而不屑以辭華相尚則所謂有馮有翼有孝有德者安在不如古哉亦可知上之所取乎人材者在此而不在彼而下之自勵其行以為効用之地者本末輕重之間辨之不可不早也

詩經

有馮有翼有孝有德以引以翼豈弟君子四方為則

編修臣張為儀

朱子曰言得賢以自輔如此則其德日修而四方以為則矣

呂祖謙曰人主常與慈祥篤實之人處其所以興起善端涵養德性鎮其躁而消其邪日改月化有不在言語之間者矣

臣謹按卷阿之篇序以為召康公誡成王之作其

前數章先詳言受福之盛而此第五章則推原致福之本在乎君身而君身之修在得人以自輔也蓋人君以一身居崇高之位持威福之柄所欲必得所為必成則其志易滿其情易肆苟前後左右之人不能陳善閉邪以引君於當道則凡耽樂玩好之事其始特偶然行之耳繼且習為固然日新月異有加無已縱耳目之欲違起居之宜其所關

於君德者非細故矣古之聖王惟深鑒乎此故既
立三公以經邦論道又設師氏保氏以勸懲諫惡
下逮侍御僕從罔非正人以旦夕承弼厥辟則匪
僻之端不得乘隙以入縱或萬幾之餘偶為遊觀
以適意而心有所主斯伴矣優游自喜樂不失其
節所以君德日隆而四方咸奉為則也三代以下
如唐太宗宋仁宗皆史冊所稱賢主嘗考唐貞觀
初年即置宏文館精選文學之士令更日宿直聽

朝之暇引入內殿講論前言往行商榷政事宋景祐元年置崇政殿說書日輪二人以備質問夫唐宋二宗德性雖由天授而學問之功其取資於諸臣者固不為無補也且夫人主之學與常人異何也常人之學期於通章句工文辭退則講道論德能訓迪子弟進則承流宣化能播政邦國如是已耳若人主則以一身任天下之重其事至蹟其幾至微其所以蔽之者又至巧而且衆苟徒恃一已

之聰明而不能參伍以通其變執兩以用其中將
意以為仁而或流於姑息意以為義而或流於苛
刻盖有失之毫釐謬以千里者故曰自用則小好
問則裕此非若常人尋章摘句之學可以專門名
家者也故必虛懷忘勢兼聽並觀審取馮翼孝德
之臣崇其禮秩假以顏色時復召對便殿與之從
容講論則庶能獻可替否拾遺補闕有以周知天
下之情形而不為所蔽在君身則收諸臣羽翼之

功在四方則沐大君豈弟之澤豈不盛哉在宋明
道程子嘗告其君曰願禮命老成賢儒不必勞以
職事俾日親便座講論道義以輔聖德又擇天下
英俊使得陪侍法從朝夕延見開陳善道講磨治
體以廣聞聽而伊川程子亦謂人主一日之間接
賢士大夫之時多親宦官宮妾之時少則可以涵
養氣質而薰陶德性故請謹選賢德之士以侍勸
講講讀既罷常留以備訪問從容燕語不獨漸磨

德義至於人情物態稼穡艱難日積既久自然通達固皆卷阿此章之意也

欽定四庫全書

卷十八

詩經

有馮有翼有孝有德以引以翼豈弟君子四方為則

檢討臣齊召南

朱子曰言得賢以自輔如此則其德日備而四方以為則矣此章以下乃言所以致上章福祿之由也

臣謹按自古言治未有過於虞周者也虞廷賡歌載在尚書周室矢音列於大雅千百世下誦詩讀

書者猶可以想見當日君臣之遇雖語有繁簡體
有質文辭有婉直而丁寧往復以規為頌當太平
極盛之日皆兢兢乎有持盈保泰致治無已之思
詩書所稱若合符節書言敕命詩言彌性敬天之
學同也書言百工熙庶事康詩言四方為則為綱
勤民之政同也其所異者舜歌喜起責難股肱臯
陶賡明良責難元首詩惟有召公矢音之詞耳然
即召公矢音以論所謂顓顓卬卬如圭如璋者非

即元首之起與明乎所謂有馮有翼有孝有德非
即股肱之喜與良乎必有馮翼孝德之助然後君
德備而福祿全非即舜所謂股肱喜而元首起乎
馮翼孝德即吉士吉人之選亦即臯陶陳九德所
云彰厥有常者也能引能翼為上為德而媚于天
子為下為民而媚于庶人此賢者之所能自必者
也有馮翼孝德而不以為引為翼多吉士吉人而
不使之命之此非賢者之所能自必者也惟君子

能用馮翼孝德而後收引翼之功能使吉士命吉

人而後獲媚天子媚庶人之益斯又豈非臯陶所

謂元首明而股肱良者乎故曰詩書所稱若合符

節也抑臣又有說焉周自文王天章雲漢壽考作

人武王燕翼詒謀保有厥士至於成王周召作輔

太公為師畢公君陳康叔史佚之倫穆穆布列樂

正所教司徒所興司馬所論德行道藝之士罔勿

在位賢才衆盛千載一時詩言馮翼孝德時固實

有其人詩言以引以翼時亦實有其事豈尚有吉
人吉士伏處巖穴沈滯下僚未及升庸者耶就使
偶有一二其德其才亦必不能與周召諸公並而
召公猶復孜孜以旁求俊乂為成王勸古大臣虛
懷若谷亟於得賢為國家久安長治之計至深且
遠固如此乎哉周公陳立政拳拳於三宅三俊之
克宅克俊且曰繼自今立政其勿以儉人其惟吉
士此其所以致周之治比美唐虞也歟



詩經

有馮有翼有孝有德以引以翼豈弟君子四方為則

檢討 臣 胡澤潢

臣謹按天佑下民作之君白虎通曰君者羣下歸心也不擾匹夫匹婦謂之皇又爾雅釋言曰皇匡正也詩曰四國是皇是也史記正義曰德象天地曰帝仁義所往曰王皆君稱也而又稱君子者白虎通曰道德之稱也言能全備道德以作之極而

四方胥會歸焉所謂則也則之立不立視乎德之
修不修而修德之要則在取人以自輔孔子告哀
公以為政在人數語可謂約而盡矣自堯舜以來
經史所載頌揚主德未有不言得人者凡其明目
達聰迪知忱恂克知灼見兢兢焉致難且慎者非
但以羣策羣力備股肱耳目之司實賴以啟心沃
心示蕩平正直之極也名公匡輔成王繼文武之
盛當時侍御僕從罔非正人猶以馮翼孝德為規

何也從來創業難守成尤不易成王守成者也得人則德立而四方是效失人則德隳而其盛難久故切切焉以為朝廷選建庶官而但得頤指氣使之輩將日即於怠惰恣肆非所以示表的於四方也必日與嚴氣正性者居同慈祥篤實者處於以感發善端涵養德性鎮其妄而消其邪日改月化而風動之休不難坐致矣其曰馮者出入可依也翼者左右有輔也孝則至性最篤德則宅心最醇

引如行之有導翼如飛之有羽惟馮翼可為引翼之資惟孝德可當馮翼之任惟引翼乃可成君子所謂表端影正儀型不忒者也其曰豈弟何也禮記曰凱以強教之弟以說安之君子於嚴氣正性者而得豈於慈祥篤實者而得弟於以說安強教於四方皆引翼得人之效也御者駕齧膝乘旦之良周流八極萬里一息治者鑄干莫之劍水斷蛟龍陸剗犀革何則有其資者易為功也馮翼孝德

之於君子亦猶是矣獨是宣力必藉乎才若孝固
德中所包舉者耳詩不以才德並稱而重言孝者
盖才德從古無分言者臯陶九德皆才也八元八
凱之才皆德也言德而才在其中况孝為百行之
首求忠臣必於孝子故舉其重言之耳其先言純
嘏福厚而後言得人為則者何與上智者言則直
頌之或直規之禹臯益稷諸謨皆是也若上智而
下姑先舉其效斯易入而樂從孔子之於哀公亦

此意也此詩通體皆頌惟此節正告之後復以車馬之盛諷之以見人君本有得賢之資但患不求耳成王賢主也而召公規之若此可謂善成其君者夫子所以列之於雅歟

詩經

有馮有翼有孝有德以引以翼豈弟君子四方為則

檢討

臣

周孔從

朱子曰馮謂可為依者翼謂可為輔者孝謂能事親者德謂得於已者引導其前也翼相其左右也言得賢以自輔如此則其德日修而四方以為則矣

臣謹按卷阿之詩其前所敷陳者既極壽考福祿

之盛而此章歸本之論不外用賢以修德蓋德為
致福之原而賢為修德之助人君所宜加意也今
夫人之賢行至不一矣以其適於用者而言謂之
馮翼以其本於心者而言謂之孝德呂祖謙曰賢
者之行非一端必曰有孝有德者人主常與慈祥
篤實之人處自有以興起善端涵養德性是即以
孝德為可馮翼之人也然分而論之忠諒可託心
膺馮也才猷可任股肱翼也善事其親斯有移忠

之心有得於心斯具正物之學孝與德也宋劉摯

有云人才難得能否不一性忠實而才識有餘上也才識不逮而忠實有餘次也是馮翼孝德各有可見之行即各有奏效之實特患不舉而用之或淪棄於草野或沈浮於下位雖有翼為明聽之能亦莫由自表著耳以此知有之云者非任其有於下乃歸其有於上也有之則必以為引焉更必以爲翼焉引者資其開導所謂示我周行引君當道

也翼者資其贊助所謂股肱惟人左右厥辟也夫
人主繼天立極法天行健廣廈之間細旃之上所
為朝乾乾而夕惕若者固自有懋昭厥德之功非
外假於臣隣然要惟不自恃其聰明而廣求乎賢
哲使輔弼無非正人啟沃盡屬良佐斯君德修而
皇極建明哲所以作則也其總歸之豈弟君子者
何也蓋仁者天地生物之心也人君有豈弟之德
又得賢人為之輔佐以培養其仁厚之基推廣其

仁愛之澤斯足副天地生物之心所以表儀型而
作四方之則者在是以承天眷而膺諸福之祥
者亦在是矣可見人君莫要於修德修德莫要於
用賢詩之頌文王者既述疏附先後奔奏禦侮以
徵濟濟多士之盛而召康公復舉馮翼孝德勸勉
成王則求賢自輔洵君天下者之要務哉

詩經

豈弟君子四方為則

監察御史臣劉方藹

朱子曰言得賢以自輔如此則其德日修而四方以為則矣乃所以致福祿之由也

臣謹按先儒謂治天下有則是聖王之所以範圍天下天下之所以受治於聖王者歸於則焉已矣自性命之微以及倫常之大制度品節之詳莫不

各有不易之矩焉皆所謂則也盖有物有則者君子與四方所同得於天者也順帝之則君子所以法天有典有則君子所以法祖明哲作則君子所以修身式和民則君子所以宜民以斯知則之難言而為則之不易君子不知何如進德修業而始得此於民也且夫水不能自為方圓而方圓一視乎盂草不能自為起伏而起伏一視乎風君子於四方分相維也勢相統也情相屬也性相感也其

所以準繩規矩乎四方者一視乎君子而況四方之廣四方之人之衆風氣異宜質文異尚將使之一道同風羣歸天則而欲君子以一人之心思耳目為之普徧周詳勢固有所不能而力亦有所不給是所賴衆君子之羣策羣力宣上之德達下之情共成一君子之豈弟使四方之人莫不各有一豈弟君子在其心目中作之君作之師漸摩以仁義陶淑以禮樂修其教不易其俗齊其政不易其

宜使之遵道遵路而國不異政家不殊俗也由是
知先公之酋皆為則中之積德累仁也百神爾主
皆為則中之上下皆有嘉德以薦馨香也純嘏爾
常皆為則中之天不愛道地不愛寶人不愛情也
凡四方之是則是倣者莫不以豈弟之心為心以
君子之品為品則在性命而徧為爾德也則在倫
常而五典克從也則在制度品節而是訓是行四
達不悖也豈不盛哉則夫豈弟君子之所以必求

衆君子列於庶位以廣馮翼孝德於四方者端為
維民之則重焉爾

詩經

鳳凰于飛翺翺其羽亦集爰止藹藹王多吉士維君子使媚于天子鳳凰于飛翺翺其羽亦傳于天藹藹王多吉人維君子命媚于庶人

編修臣張湄

朱子曰媚順愛也

謝枋得曰媚于天子愛君也媚于庶人為王愛其民也

輔廣曰此因時鳳凰之至而以興賢者之來集也
維君子使命謂委命於君一聽其使令也媚于天
子見賢者無勉強不得已之意媚于庶人見賢者
有維持浹洽之德

臣謹按人臣之事君也為上為德為下為民其獻
可替否而不容委蛇者道主乎敬其協恭和衷而
無所矯拂者心主乎愛敬非愛則矜或至於爭而
愛非敬則羣必流於黨故媚之為言愛也人皆知

之而朱子必訓曰順愛凡以情之無當於理者不
得為順順愛云者蓋本敬之道以行其愛之心者
也以是言媚則媚于天子而上交不諂矣媚于庶
人而下交不瀆矣媚天子者愛君如愛父不獨將
順為愛即有時匡救亦愛也媚庶人者愛民如愛
子不獨戒休為愛即有時董威亦愛也非然則婦
寺之愛姑息之愛其為不敬莫大乎是豈馮翼孝
德之人所敢出此哉且夫君者民之心民者君之

體而使吾君與吾民上下歡欣交通于無間者多
士引翼之力也是故欲媚于天子未有不媚庶人
而能媚庶人即所以媚天子其在書曰惟尹躬克
左右厥辟宅師此以媚天子者媚庶人也其在詩
曰柔遠能邇以定我王此以媚庶人者媚天子也
然而媚天子者維君子使媚庶人者亦維君子命
所謂奉揚仁風宣布德意人臣之道不過如地之
順承乎天而已地順承乎天乾坤所以成泰交臣

共令乎君明良所以稱一德在昔虞廷賡喜起鳳
几來儀周室盈太和鳴鳳在郊志壹則動氣觀物
類之感召而知卷阿之咏與簫韶之奏後先媲美
若出一轍者信乎其在君臣之際也



詩經

鳳凰鳴矣于彼高岡梧桐生矣于彼朝陽
萋萋萋萋

編修臣諸錦

毛萇傳云梧桐柔木也山東曰朝陽梧桐不生山
岡太平而後生朝陽臣竭其力則地極其化天下
和洽則鳳凰樂德

鄭玄箋云鳳凰鳴於山脊之上者居高視下觀可

集止喻賢者待禮乃行翔而後集梧桐生者猶聖
君出也生於朝陽者被溫仁之氣亦君德也鳳凰
之性非梧桐不棲非竹實不食葦葦萋萋喻君德
盛也羅羅喈喈喻民臣和協

臣謹按羅羅喈喈紀一時之鳳鳴如此以為和也
析言鳳凰為二統之則鳳凰一也王充必舉禮記
瑞應篇以相難雄者曰鳳雌曰凰雄鳴曰即即雌
鳴曰足足此聲異也聲審則形不同使審同詩與

禮異世傳鳳凰之鳴故將疑焉然荀子又云鳳凰
秋秋其翼若干其聲若簫有鳳有凰樂帝之心矣
是秋秋并鳳凰而言之也鄭箋善矣王充所見殊
細又此詩為召公所作與尚書君奭篇相表裏周
公曰考造德不降我則鳴鳥不聞矧曰其有能格
又曰天休滋至惟時二人弗戢其汝克敬德明我
俊民在讓後人於丕時是即下章車馬招賢之意
盖自虞廷來儀之後閱千有餘年乃得有此天休

實係非常之瑞得賢人以釀成太和之景運此老
臣經國太平長久之深衷非徒為忻幸承奉之詞
也毛鄭兩家之外朱子未暢其旨故發明之

詩經

詢于芻蕘

監察御史 臣 叢洞

臣謹按聖人經綸天地所以明察於倫物而貫徹乎天人者惟其神靈之哲燭照於無外亦惟其虛讓之懷諮訪於不遺也蓋恒人以一己之知識為知識聖人以天下之聰明為聰明極天下知能之理合而歸諸聖人廣之天而諮諏諮謀至不遺

於匹夫匹婦之微則聖人之所取者愈廣而所通者愈微此先民所以有詢于芻蕘之言也稽古帝王明目達聰嘉言罔攸伏一時良弼碩輔以及百僚庶士濟濟贊襄各効忠款裨益多矣即有時清問下民博採輿論或亦當世之隱人君子出其卓見敬抒一得以備集思廣益之一助至于芻蕘至微至陋不過牧豎樵夫者流耳其人非有特識也其所稱道亦可意想而知也而且懇懇焉詢於其

人何也今夫泰山不辭土壤故能成其高河海不
擇細流故能成其深聖人不遺邇言故能成其大
昔者禹拜昌言設鐘鼓鞀鐸以來四方之士衛武
公髦而好學日求助於國人是以前古聖帝明王
之廷雖瞽師工賈皆得修其職事而納其忠款誠
以天生蒸民均有恒性不識不知亦順帝則芻蕘
雖賤亦秉彝之人耳其心未必遂無知覺也其日
用飲食之質所得行而著習而察者未必其盡夢

夢也夫天命之真無物不體淺近之迹至道所存
芻蕘者誠未堪以致其廣大而盡其精微而一物
之所利一事之所宜得於父老之傳聞而成於技
業之熟習意境親切之致有時聞人達士所不到
者或為山叟野老之所悉以為芻蕘而忽之竊恐
勤懇訪道之心已有及有不及矣是以先民之詢
非必滯於芻蕘也而自不遺乎芻蕘蓋天下理道
之所寄以盛滿之懷視之則無深之非淺以虛謙

之懷取之又無淺之非深自芻蕘而集之由芻蕘而通之無貴賤無小大其聞見皆足以相益其心思皆足以相資大其心以體天下之道即虛其衷以求天下之言大舜執兩用中而孜孜於通言之察者此物此志也

詩經

訐謨定命遠猶辰告

監察御史臣高景蕃

朱善曰謨之訐猶之遠自綱領上說所以立一代之規模者也命之定告之辰所以為一時之政事者也

臣謹按自昔聖帝明王之致治也必以可大可久者立一代之紀綱而後能聯四海為一家貞萬年

於一日而要其發號施令之際則又非苟焉而已
蓋二三非所以集事怠忽非所以圖功惟人主德
行備於厥躬則精神直貫於事後念慮常燭於幾
先其措之政令間者既一成而不易亦當可之謂
時而游移叢脞之習舉不足以中之斯以成可大
可久之業而無難也何則德見為謨上自朝廷而
下行草野類非一身一家之計也億兆之生靈繫
焉德見為猷肇自創始而迄於垂成更非一朝一

夕之計也百世之丕基裕焉此豈猶夫近功淺效者可以苟且遷就於其間耶必也體父乾母坤之義而為經世宰物之圖本朝乾夕惕之衷而為必世百年之慮利所在與天下共興之即為萬世開太平害所在與天下共革之即為萬世杜隱禍訐謨也遠猶也詎不足以立一代之紀綱哉顧三代以下非無英君察后規模宏遠亦自有孜孜求治之想而德行未純其始無審度之能其後有紛更

之擾抑或倦勤中止無肫懇誠至之思以告誠於
宮府內外間豈古聖王勵精圖治無逸艱難之意
也哉夫所謀既大則號令自不得輕發一令而朝
行夕改不能訏謨者也所謀既遠則丁寧不得不
切令不時而坐失機宜不能遠猶者也其在書曰
俾萬姓咸曰大哉王言又曰一哉王心斯定命之
謂也易曰隨風巽君子以申命行事又非辰告之
意也與衛武公以此自儆所由內自庭除之近外

及蠻方之遠細而寢興灑掃大而車馬戎兵必至
此而慮無不周備無不飭也庶幾哉聖人不泄邇
不忘遠之盛心矣

詩經

相在爾室尚不愧于屋漏

監察御史 臣馮鈐

臣謹按天下有可潛之形而必無可諱之心人心有自弛之境而斷無自昧之良大廷廣衆天下屬耳目也幽獨隱微寸衷所默喻也地則有分理無二致使岐而視之而心之緣以為敬肆邪正者又何可窮極哉衆著之頃畏指摘獨處之餘無糾虔

將易一境以微窺逾一時而遞變向之儼然動罔
不臧者靜而證焉直有前後若出兩人者矣是第
知檢點於昭昭之節而未嘗警惕於冥冥之修共
覩共聞之地文飾有餘不覩不聞之會操持不足
若此者縱能逃乎物議能無愧於屋漏耶性理觀
物內篇謂人之善惡形于言發於行人始得而知
之但萌諸心發於慮鬼神已得而知之矣又云人
之神即天地之神人之自欺所以欺天地可不慎


乎爾室之中正工夫喫緊之際故一舉念必凜其
念之所從來無論不善之念不可以告人不可以
盟心為有愧也即本屬善念或一時有為而為有
激而然斯世即無從斥其隱而返觀內省遽詡詡
然自信其為善可乎由是思愧愧正多矣夫人非
聖人亦安能渾然天理念慮之間有善無不善哉
要其隱隱自持以矢諸旦明者不可不常存此愧
心也故詩不曰無愧而曰尚不愧者誠以知所愧

或庶幾可以無愧苟不知所愧勢且憧擾於中形
役於外可愧之端日益積知愧之天日益漓久而
汨其本真彼其獨居爾室固未嘗不俯仰泰然然
而臨之在上質之在旁試三復於詩詞其又何以
自安十目十手指視維嚴虎尾春冰箴規倍切古
之人勲業隆天壤而衾影實凜四知大節在千秋
而冰淵祇存方寸固有確見乎心之不可出入而
理之斷難寬假也書曰無載爾偽作德心逸日休

作偽心勞曰拙易曰君子終日乾乾夕惕若禮曰
執虛如執盈入虛如有人自昔聖賢收斂身心鞭
辟入裏特多方著為緊切之語垂誡後人言各有
倫而有脊理固同條而共貫焉耳



御覽經史講義卷十八



總校官庶吉士臣侍朝

校對官編修臣許兆椿

謄錄監生臣溫之誠